

皇  
明  
史  
概

皇明大事記卷之八

朱國禎輯

學較

上定鼎金陵之年卽如江淮府

今鎮江府

謁孔子廟尋自將

取婺設儒學以葉儀宋濂吳沉爲教官又徵劉基等入

京置儒學提舉司以宋濂爲之授世子經胡廷瑞來降

上如龍興路

今南昌府

謁孔子廟宴滕王閣命諸儒賦詩時

諸名儒集都下

上與論經史及咨以時事甚見尊寵

復命有司卽所居之西創禮賢館處之收用益多乙巳

置國子學以故集慶路學爲之設博士助教學正學錄

與樂典書典膳等官以許存仁爲博士丁未十二月大將軍至兗州偏將顧典祖分徇各縣孔子六十六代孫襲封衍聖公孔希學率曲阜縣尹孔希章鄒縣主簿孟思諒等迎見興祖於軍門興祖禮之於是兗州以東州縣皆來降十月定國子學官制

存仁爲祭酒劉承直爲司業

洪武元年戊申二月以大牢祀先師孔子于國學仍遣使詣曲阜致祭使行上謂之曰仲尼之道廣大悠久與天地相並故後世有天下者莫不致敬盡禮修其祀典朕今爲天下主期教化以行先聖之道今旣釋奠國學仍遣爾修祀事于闕里爾其敬之尋以國學規制未

廣謂中書省臣曰太學育賢之地古帝王建國君民以此爲重朕承困弊之餘首建太學招來師儒教育生徒今學者日衆齋舍卑隘不足以居其令工部增益必高明軒敞俾講習有所游息有地庶達材成德者有可望焉希學父元國子祭酒孔克堅來朝上召見優遇之

見大訓記

八月遣官釋奠于先師孔子初禮官奏周禮凡始

立學者必釋奠于先師四季如之漢儒以先聖爲周公若孔子以先師爲禮樂詩書之官其後若禮有高堂生樂有制氏詩有毛公書有伏生可以爲師者蓋四時之學將習其道故釋奠各以其師而不及先聖惟春秋合

樂則天子視學有司總祭先聖先師是則漢時釋奠亦畧可見魏正始中使太常行禮于辟雍晉于國學東晉成穆孝武皆親行隋制國子監每歲四仲月上丁釋奠先聖先師州縣學則用春秋仲月唐初儒官自爲祭主直書博士姓名敢昭告于先聖許敬宗奏請令國子祭酒爲初獻丞爲亞獻主簿及尉通爲終獻詞稱皇帝謹遣仍令司樂爲亞獻博士爲終獻縣學則令爲初獻丞爲亞獻主簿及尉通爲終獻武德貞觀中皆以二月親幸國子監釋奠開耀景龍中皆皇太子開元中詔以三公攝事若遇大祀則用仲丁縣州用上下宋元因古禮

而損益之今宜定制以仲春秋二上丁日降香遣官祀  
于國學以丞相初獻翰林學士亞獻國子祭酒終獻十  
二月考定襲封之制先元仁宗授孔思晦中議大夫襲  
封衍聖公賜四品印泰定三年山東廉訪副使王鵬南  
言孔子之後襲爵上公而階止四品於格弗稱且非所  
以尊崇先聖之意明年陞嘉議大夫至順二年改賜三  
品印至是 上謂禮部臣曰孔子萬世帝王之師待其  
後嗣秩之三品弗稱褒崇其授希學衍聖公二品階給  
銀印希學思晦之孫也孔希大爲曲阜世襲知縣置衍  
聖公官屬曰掌書曰典籍曰樂曰知印曰奏差曰書寫

各一人立孔顏孟三氏教授學錄學司各一人立尼山  
洙泗二書院各設山長一人復孔氏子孫及顏孟大宗  
子孫徭役官屬並從衍聖公選舉呈省擢用授希學誥  
曰古之聖人自羲農至于文武法天治民明並日月德  
化之盛莫有加焉然皆隨時制宜世有因革至于孔子  
雖不得位會前聖之道而通之以垂教萬世爲帝者帥  
其孫子思又能傳述而名言之以極其盛有國家者求  
其統緒尊其爵號蓋所以崇德報功也歷代以來膺襲  
封者或不能繩其祖武朕甚憫焉當臨馭之初訪世襲  
者得五十六代孫孔希學大宗是紹爰行禮以致褒崇

爾其領袖世儒益展聖道之用於當世以副朕之至望  
豈不偉歟可資善大夫襲封衍聖公授希大勅曰朕惟  
德相天地道合四時若此者于今罕焉雖然始伏羲而  
至有元聖相繼賢接踵未嘗缺也然如仲尼者絕無且  
秦焚之後亡於紀冊但存者未完獨仲尼誠通下上澤  
敷宇內所以自漢崇之至唐追封文宣王宋加至聖元  
加大成號封至極血食無窮其子孫世享榮祿所以前  
代以闕里之邑職其子孫今是邑缺官導民族以賢推  
惟孔希大最今特以希大授承事郎知濟寧府兗州曲  
阜縣事汝往欽哉



洪武二年遣克堅祀闕里出內府香幣并白金百兩俾  
具祭物仍命通贊舍人張漢英次之 上諭克堅曰先  
師孔子扶持世教功德廣大萬世帝王之師也朕今命  
爾往祭蓋以爾爲子孫祭以歆饗宜致誠潔以副朕懷  
命博士孔克仁授諸子經功臣子弟皆令入學賜國子  
生夏衣 上諭國子學官曰治天下以人材爲本人材  
以教導爲先今太學之教本之德行文以六藝遵古制  
也人材之興將有其效夫山木之所生川水之所聚太  
學人材所出欲木常茂必培其根欲水長流必濬其源  
欲人材成就必養其德性苟無作養之功而欲成其材

譬猶壅百川而欲水流折方長而求大木可得哉召問  
國子生習射與否勗以文武爲憲之說時國子生至者  
甚衆上銳意作興謂朞月三年必世孔子因時制宜  
魯兩生迂典禮樂何必百年下中書普立天下學校詔  
曰古昔帝王育人材正風俗莫先於學校自胡元入主  
中國夷狄腥膻污染華夏學校廢弛人紀蕩然加兵亂  
以來人習鬪爭鮮知義禮今朕統一天下復我中國先  
王之治宜大振華風以興治教近雖內設國子監恐不  
足以盡延天下之俊秀其令天下郡縣并建學校以作  
養士類其府學設教授一員秩從九品訓導四員生員

四十人州學設學正一員訓導三員生員三十人縣學設教諭一員訓導二員生員二十人師生月廩食米人六斗有司給與魚肉學官月俸有差學者專治一經以禮樂射御書數設科分教務求實才頑不率者黜之

三年典簿周循理請擇經明行修之士充學官而增置其員民間子弟俊秀年十五以上願入國學者聽復其身京官子弟一品至九品年十二以上入學者定其出身資格太學生員舉進士俱聽優等擢用如此則在內國子生漸增廣在外有常貢科舉進士不患無人矣上是其言命中書省增廣太學生定其出身資格仍擇

文儒性行端潔者充學宮八月遣官釋奠孔子于國學  
其曲阜廟庭官給牲帛俾衍聖公主祀事歲以爲常十  
月御史袁凱言國家邊平四方固資將帥之力然今天  
下已定將帥多在京師其精悍雄傑之士智雖有餘而  
於君臣之禮恐未悉究臣願於都督府延致通經學古  
之士或五人或三人每於諸將朔望早朝後俱赴都堂  
聽講經史庶幾忠君愛國之心全身保家之道油然而  
生而不自知也天生人材無非爲天下國家計其群臣  
太無廉耻之人有犯固在不赦至於老成長者或有過  
誤宜加矜恕養成以收它日之功則人材輩出矣上

嘉之遂勅省臺延聘儒士於午門外番直與諸將說書  
詔復孔氏子孫二十六戶徭役凡國子監官滿三考者  
陞秩仍任以四方來學者益衆再增國子學舍徵孔  
克表爲修撰先宋南渡衍聖公從而南家溫之平陽宋  
亡停襲子孫甚衆克表其裔也博學篤行善屬文尤長  
于史以薦授官

六年禮部奏增廣國子生 上曰須先擇國子教官師  
得其人則養有效非其人增廣徒多何益御史中丞陳  
寧兼領國子監事儒臣製釋奠孔子樂章初用大成登  
歌樂元擬易之未用仍用宋舊國初亦因之至是始命

更製學士承旨虞同撰上禮部尚書牛諒復定禮儀准

劉基等失陪祀受胙奪俸一月衍聖公希學來朝

班亞丞相

華丞相班六部上今班首

禮部致餼務從厚辭歸資銀

百兩綺帛各五匹宴光祿寺翰林官餞送希學言先師廟堂廊廡圯壞祭器樂器不備先世田產兵後多蕪廢而歲輸稅額尚從實徵納乃命有司照式修治其田產荒蕪者悉蠲稅仍設孔顏孟三代子孫教授訓其族人仍加以勅

八年正月 上謂中書省臣曰昔成周之世家有塾黨有庠故民無不知學是以教化行而風俗美今京師及

郡縣皆有學而鄉社之民未覩教化宜令有司更置社學延師儒以教民間子弟庶可導民善俗也亡何命御史臺官選國子生分教北方諭曰致治在於善俗本於教化教化行雖間間可使爲君子廢則中材或墜於小人近北方喪亂之餘人鮮知學欲求學問之士甚不易得今太學生中年長學優者宜選取俾往北方各郡分教庶使人知務學賢材可興於是選國子生林伯圖等三百六十人給廩食賜衣服而遣之擇國子生年少聰敏者入文華武英二堂說書謂之小秀才甚見寵遇皆昇清職俱爲御史季擴爲給事中兼齊相府錄選先

是孔希大知曲阜縣爲人所告 上以先師之後釋不問父之免官特以孔克伸代賜勅勉以鑒前車之失無忝聖裔以後代者皆賜勅今否 詔國子生於諸司歷事有未娶者賜錢婚聘更賜女衣二襲月給米一石贍之

十年命大都督官選武臣子弟入國子讀書諭曰武臣從朕定天下以功臣祿其子弟長于富貴又父兄早歿鮮知學問宜令讀書知古今道理俟有成立然後命官庶幾得其實用昔霍光功非不高身死未久而子孫橫肆卒致夷滅者不學故也郭子儀中興唐室功蓋天下位極人臣而心常謙退保全令名而福及後嗣者識道



理也今武臣子弟但習武事特患在不知學耳

十二年 上聽朝之暇延諸儒臣賜坐便殿講論治道  
時國子學官李思迪馬懿緘默不語 上惡之勅諭國  
子師生日賢者以學爲本推而行之誠實無僞有裨于  
國家善名立于兩間則無愧于所學若懷詐自私上無  
助于君下無益于世朕何賴焉如李思迪馬懿朕以其  
學者日召同遊期在嘉言善行啟朕未明而輔朕不足  
乃終日緘默畧無一言旁有講說經史者因而問及不  
過就他人之辭以對未嘗獨一言補所未知豈朕昏昧  
不足與聞耶抑朕之禮未至耶何訪之以道而不相告

也又遣侍東宮欲發明先帝王之道匡弼輔贊以成其德器亦無異事朕之時其挾詐甚矣昔孔孟懷聖賢之道恨不得用爲生民福故歷聘列國至老不倦今思迪等發身草野一旦與人君同處殿廷之上人君躬就問之此正行孔孟之志之日而緘默如此學孔孟者果如是乎孔子入周廟見金人三緘其口曰此古慎言人也蓋謂非法之言耳若理道之辭果宜禁乎且思迪等事朕如此其肯盡心訓國子生乎朕諭汝等自今爲師者必盡其師之職學者必盡其學之道一以孔孟爲法以副朕責望之意慎毋如二人之爲也置天下學校師生

廩米人日一升魚肉鹽醢之類皆官給之

十四年起致仕尚書李敬爲祭酒侍郎劉崧爲司業頒五經四書于北方學較四月丙辰朔詔改建國子學雞鳴山下命國子生兼讀劉向說苑及律令賜國子生布帛各一疋時於諸生中選才學聰俊士得三十七人命之博極群書講明道德經濟之學以期大用稱曰老秀才恩遇甚厚九月禮部尚書李叔正言州縣儒學訓導多以賢良等科薦舉至京以致師範缺員生徒廢業上曰學較人材所出朕方以未得明師爲憂而有司又拔而舉之甚失教育人材之意其卽禁之著爲令時崧

江府華亭縣儒學教諭曹宗儒屢爲府縣差遣宗儒以爲言上諭禮部臣曰教官訓導所以作養生徒爲國儲材通者有司徃徃委以公務使不得盡心訓教甚非所以崇儒重學之意其禁止之

十五年新建國子學成改爲國子監本六朝樂遊苑地東半爲小教場西半建學延袤可四里殿堂壯麗前爲橫街直南曰成賢街號房射圃傍列餘爲菜園自經始以來上數臨視比落成遣官致祭命學士宋訥記其始末仍以舊國子學爲應天府學時天下普建儒學而先師祀典尚未舉至是始命通祀凡各學田租入官者

悉歸于學俾供祀及師生俸廩分爲三等府學一千石  
州學八百石縣學六百石應天府學一千六百石設吏  
一人司出納師生月給廩米一石教官俸如舊 上將  
幸國子監行釋菜禮諭儒臣曰議者謂孔子雖聖人臣  
也禮宜一奠再拜朕以爲孔子明道德以教後世豈可  
以職任論昔周太祖斷然再拜不惑左右之言今朕君  
天下敬禮百神於先師之禮宜加尊崇禮部尚書劉仲  
質乃定議五月十七日乙丑 駕至大成門外御幄具  
皮弁服入酌酒詣先師再拜進爵 上獻又再拜百官  
皆陪拜四配十哲兩廡分獻如常儀 上復御幄易服

乘輿詣學宮祭酒吳顥司業博士助教等四人以次升  
堂坐講侍臣東西序坐講畢上勉以儒道儒行儒教  
取尚書大禹臯陶謨洪範親爲講說反覆開諭群臣聞  
者莫不悚悅遂賜宴竟日而還明日祭酒率學官上表  
謝人賜衣二襲仍加勅諭頒示學規遵守以釋奠儀注  
普行天下府州縣學各以正官主祭有布政官則以布  
政司行其分獻則本學儒職及老成儒士充十哲兩廡  
一獻新製祭服則主祭陪祀官與凡執事者用之陪祀  
儒士深衣幅巾每歲以春秋二仲月上丁日行事下各  
按察司選府州縣學生員年二十以上質厚貌端有志

學問願入國學者送京師既而至者千餘人禮部考其

文中式者留之不中者遣還

御史趙仁等言學較之設本以作養人材窮理正心

期有實効今天下生員多不遵師訓出位妄言非希進用則挾私讐謔甚失朝廷教養之意宜令有司嚴加禁止日省月試務在成就果有奇材欲陳便民利國之術者請與教官詳議可否同列姓名然後上達若其言有可取仍令題考試文字中式者不次擢用定學較禁例十

二條一曰生員事非干已之大者毋輕訴于官二曰父母有過必懇告至於再三毋致陷於危辱三曰軍國政事生員毋出位妄言四曰有學優才瞻深明治體年及三十願出仕者許敷陳王道講治化迹爲文辭先由教官考較果有可取以名上于有司然後赴闕以聞五曰

爲學之道必尊敬其師凡講說須誠心聽受毋恃已長  
妄爲辯難六曰爲師者當體先賢竭忠教訓以導愚蒙  
七曰生員勤惰有司嚴加考較獎其勤敏斥其頑惰斯  
爲稱職八曰在野賢人君子果能練達治體敷陳王道  
許其赴京面奏九曰民間冤抑等事自下而上陳訴不  
許騁越十曰江西兩浙江東之民多有代人訴狀者自  
今不許十一曰有罪充軍安置之人毋妄建言十二曰  
十惡之事有干朝政實跡可驗者許密以聞其不遵者  
以違制論仍命以所頒禁例鐫勒臥碑置於明倫堂之  
左十月諭禮部曰學官所以造就人材模範後進非老



成篤學之士莫宜居是其令各按察司精考儒學學官不通經術者送吏部別用其有通經術能文章滯於下僚者悉以名聞令生員講讀劉向說苑新序十一月諭禮部曰古先聖賢立言以教後世所存者書而已朕每觀書自覺有益嘗以諭徐達達亦好學親儒生業書自隨蓋讀書窮理於日用事物之間自然見得道理分明所行不至差謬書之有益於人如此今國子監舊藏書板多殘闕其令諸儒考補命工部都匠修治之庶有資於學者

十六年宋訥爲國子祭酒

吳頤以寬  
從免官

諫官關賢言國朝

崇尚儒術春秋祭享先師內外費至巨萬尊師之道可  
謂隆矣天下生員歲給廩米亦數萬石養賢之禮可謂  
厚矣今新建太學聚天下英才教育之期爲國家用奈  
何所司非人師道不立平居教養既無其法及至選貢  
能不混淆至有缺員又或府選於州州選于縣致使爲  
師者不能各任其責甚至布按二司將俊秀有學問生  
員選充承差甚乖朝廷育才之意今宜令府州縣學歲  
貢生員各一人如考試中式則賞及所司否則教官訓  
導停其廩祿生員罰爲吏如是則士有勸懲學有成效  
從之命禮部榜諭天下府州縣學自明年爲始歲貢生

員各一人正月至京從翰林院試經義四書義各一道  
判語一條中式者入國子監不中者罰之諭曹國公李  
文忠曰國學育材之地公侯子弟咸在雖講授有師然  
貴游子弟非得威望重臣以蒞之則恐怠於務學故特  
命卿兼蒞其事必時加勸勵俾有成立

十七年孔子五十七代孫納襲封衍聖公初納入朝  
上問其宗族子孫多寡賢否納奏對詳明動合禮度命  
館于太學至是服闋襲封製誥文賜之尋入朝賜宴及  
鈔六月命禮部製大成樂器分天下儒學勅曰天下學  
較通祀先師孔子而樂器未備無以昭其聲容感乎神

明實典禮之缺也。亟命曉音律之人，集工製之。又曰：朕思古人之樂，所以防民欲；後世之樂，所以縱民欲。其故何也？古樂之詩章質而正，後世之歌詞淫以考古之律呂，協天地自然之氣，後之律呂出入爲智巧之私。天時於地氣不審，人聲於樂音不比，故雖以古之詩章，古之氣數亦乖戾而不合，陵犯而不倫矣。手擊之而不得於心，口歌之而不出於志。人與樂判，然爲二而欲以動天地，感神鬼，豈不難哉！然其流已久，救之甚難。卿等宜審于此，俾樂成，頒之諸生，得以肄業。熟習，庶幾可以復古人之意。以孔希大爲曲阜知縣，翰林院侍制孔希善言。

孟氏子孫有以罪輸作京師者二人 上曰大賢之後雖有罪亦當屈法宥之卽命遣還仍諭工部曰孟子傳道有功名教歷年旣久子孫甚微近有以罪輸作者朕聞卽命釋之假令朕不知及或致死亡則賢者之後寢以衰滅豈禮先賢之意哉爾等宜加詢問凡有聖賢之後在輸作依例釋之頒四書五經于北方學較

二十年 上謂工部左侍郎秦逵曰春秋之世人紀廢壞孔子述六經使先王之道晦而復明萬世永賴功莫大焉夫食粟則思樹藝之先衣帛則思蠶繅之始皆重其所由出也孔子功與天地並故朕極崇報闕里又啟

聖降神之地廟宇廢而不修何以安神靈昭來世亟及  
時修理用副朕懷以顏子五十八代孫禴爲溧陽縣丞  
先是上命戶部覈實天下土田而兩浙富民畏避徭  
役徃徃以田產詭託親隣佃僕謂之鐵腳詭寄久之相  
習成風鄉里欺州縣州縣欺府奸弊百出謂之通天詭  
寄於是富者愈富而貧者愈貧上聞遣國子生武淳  
等徃各處隨其稅糧多寡定爲幾區每區設糧長四名  
使其集里甲耆民躬履田畝以量度之圖其田之方圓  
次其字號悉書王名及田之丈尺四至編類爲冊其法  
其備以圖所繪狀若魚鱗然故號魚鱗圖冊

二十六年詔祭酒胡季安選國子生年三十以上能文

章者三百四十一人命吏部除授教諭等官

凡二司科道有缺必

十國子取用諸生用積分升至率性堂傳取凡有父母者三年歸省仍許歸娶奔期喪

六月遣國

子監生及人材分詣天下郡縣督吏民修治水利諭曰

耕爲衣食之原民生之所資而時有旱澇故不可以無

備成周之時井田之制行有預防溝遂之法遇災民不

爲病秦廢井田溝洫之制盡壞議者遂因川澤之勢引

水溉田而水利之設興焉朕嘗令天下修治水利有司

不以時奉行致令民受其患今遣爾等往各郡縣集吏

民乘農隙相其宜凡陂塘湖堰可儲蓄以備旱饑宜洩

以防霖潦者皆宜因其地勢修治之無妄興工役措克  
吾民給道里費而行

二十八年詔國子生曰孔子作春秋明三綱敘九法爲  
百王軌範修身立政備在其中未有舍是而能處大事  
決大疑者近諸生專治他經者衆至於春秋鮮有能明  
者繼今宜習讀以求聖人大經大法他日爲政臨民庶  
平有本

二十九年命國子學正吳啟署祭酒博士楊松署司業  
學錄張毅署監丞事 上面諭曰太學國家育材之地  
天下人材所聚爲之師者不專務記問博洽在乎檢身



飭行守道尊嚴使之敬慕日化于善則賢材衆矣蓋師  
嚴則道尊道尊則德立昔胡翼爲太學師嚴條約以身  
先之此最可法先後賜大誥三編督訓行人司副楊砥  
言孔子廟庭從祀諸賢皆有功世教若漢楊雄臣事賊  
莽忝列從祀以董仲舒之賢反不與焉事干名教甚爲  
乖錯 上納其言命去雄祀仲舒吳啟言國子師生例  
以學優劣分隸六堂邇來皆無甄別高下不分無以激  
勸宜考第如例 上命魏國公徐輝祖禮部翰林院官  
同詣監考試仍令吏部以次錄用毋使淹滯

祀事

洪武元年二月以大牢祭三皇明年遣中書叅政蔡哲  
行禮以勾芒祝融力牧風后配享各有祭文儀同釋奠  
上觀宋太祖詔修歷代帝王陵寢歎曰此美事也遂遣  
編修蔡玄侍儀舍人李震亨陳敏于謙等往四方求之  
仍令各行省同詣所在審視若有廟祀并具圖以聞尋  
以圖上諸陵凡七十有九禮官考功德昭著者曰伏羲  
神農黃帝少昊顓頊唐堯虞舜夏禹商湯中宗高宗周  
文武成康漢高祖文武宣光武明章後魏文帝隋高祖  
唐高祖太宗憲宜周世宗宋太祖真仁孝理凡三十有

六各製袞服由香幣遣秘書監丞陶誼等往修祀事中

有宋理宗永穆陵圖歸其頂骨

上嘗與侍講學士危素論元興替素言元世祖

至元間胡僧淳古夢高欲毀宋會稽諸陵時夏人嘗以諸帝遺骨瘞于杭之故宮築浮屠其上壓之又嘗以宗頂骨爲西僧飲器天下聞之不心服上數息之謂素曰宋南渡諸君無大失與元又非世仇元既乘其弱併取之何乃復縱奸人肆酷如是卽命北平守將吳勉訪索頂骨何在果得之西僧廬中既送至命有司瘞于京城之南至是紹興府以陵園未獻遂物瘞于陵每陵以白金二十五兩俾具祭物陵寢之祭者掩瘞

之壞者完築之廟之敝者因舊而葺之無廟者設壇以

祭牲用大牢

上親製祝文三皇堯舜各一自元以來

以神農嘗百草立三皇廟祭以鬯官

上以不親祭委

之醫藥之流非體且郡邑通祀藝清令諸儒詳考定應

祀者三十五

見大訓

于是遣使詣各陵致祭復命陵寢所

在有司禁民百步內無得樵採置牌刻祭之月日牲帛  
之數於其上設陵戶二人守之爲常式御史答祿與權  
言三皇盛德大業被於萬世我朝繼正統有天下社稷  
宗廟之神皆得享祭而躬祀三皇之禮獨闕宜肇舉成  
一代之典上納其言命參考立廟以祀尚書牛諒言  
三皇京都有廟有配享掌于太常漢高祖光武唐高祖  
太宗宋太祖元世祖宜令有司就各陵立廟每歲行春  
祭以少牢商中宗高宗周成康漢文武宣明章帝唐玄

宗憲宗後唐明宗周世宗宋太宗真仁亦宜令有司就陵廟三年一祭祭以少牢 上曰五帝三王及漢唐宋創業之君俱宜於京師立廟致祭元世祖已立廟北平今當併祭其餘守成賢君令有司每歲春秋祭於陵廟尋京師廟成塑袞冕坐像 上曰伏羲神農未有衣裳之制已之仍舊文王雖基周命終守臣節唐高祖有大下本太宗力可弗祀祀於陵壇祀隋文帝自伏羲至元世祖凡十七帝爲五室 上親祭祝文三皇曰惟大昊伏羲氏畫八卦以明天道造書契以開人文惟炎帝神農氏制耒耜以教農耕嘗百草以爲醫藥惟黃帝軒轅

氏作居室衣服以法易象創律曆官制以宣政治皆繼  
天立極開物成務有大功于生民後世者也御諱非德  
荷天祐人助君臨天下繼承中國帝王正統伏念三聖  
去世悠遠神靈在天萬古長存崇報之禮不可不至是  
用肇新廟宇于京師列序聖像及歷代開基帝王每歲  
祀以春秋仲月永爲常典今禮奠之初謹奉牲醴庶品  
致祭伏惟鑒享五帝曰惟帝金天氏金行應運因鳳紀  
官道繼三皇爲五帝首惟帝高陽氏靜淵有謀疏通知  
事潔誠祭祀治教萬民惟帝高辛氏聰以知遠明以察  
微仁威惠信天下咸服惟帝陶唐氏帝德廣運聖神武

文執中傳心道統斯著惟帝有虞氏玄德旣昇恭已而  
治世躋泰和樂奏鳳儀皆盛德被于生民大功昭于後  
世者也三王曰惟夏禹王勤儉家邦平治水土天錫九  
疇彝倫攸敘惟商湯王聖敬日躋懋昭大德建中于民  
表正萬邦惟周武王于昭武烈拯救生民廼建皇極續  
文之緒皆盛德被于生民漢高祖光武隋高祖曰惟漢  
高祖皇帝除穰平項寬仁大度威加海內年開四百惟  
漢光武皇帝延攬英雄勵精圖治載興炎運四海咸安  
惟隋高祖皇帝勤政不怠賞功弗吝節用安民時稱平  
治皆有君天下之德而安萬世之功者也唐太宗宋太

祖曰惟唐太宗皇帝英姿蓋世武定四方貞觀之治式  
昭文德惟宋太祖皇帝順天應人統一海宇祚延三百  
天下文明皆有君天下之德而安萬世之功者也餘文  
並同三皇但改攸遠作已遠元世祖曰惟神昔自朔土  
來主中國治安之盛生養之繁功被人民者夫何傳及  
後世不遵前訓怠政致亂天下雲擾莫能拯救予本元  
之農民遭時多艱憫黔黎塗炭建議聚兵圖以保全生  
靈初無黃屋左纛之意豈期天祐人助來歸者衆事不  
能已取天下于群雄之手六師北征遂定于一迺不揆  
非德繼承正統此天命人心所致非智力所能且自古



立君在乎安民所以唐虞擇人禪受湯武用兵征伐因時制宜其理昭然神靈在天不昧想自知之今念歷代帝王開基創業有功德者乃于京師肇新廟宇列序聖像每歲祀以春秋仲月永爲常典御製樂章迎神初獻亞獻終獻送神著爲式

係洪武七年以前

後去隋文帝仍五室

改建于鷄鳴山之陽

九年遣官視各陵申前禁以時封土每三年一遣使致祭其諸郡邑祀典所載忠臣烈士祠宇傾頽者有司亦以時葺治仍嚴防守邠州有姜嫄公劉二廟姜嫄后稷之母也德淑子聖后稷教民稼穡澤被萬世公劉后稷

之曾孫初逼西戎遷於邠能修后稷之業有功於民遂  
入祀典

二十一年停各廟春祭皆于八月中旬舉行帝王廟從  
祀名臣凡三十六人 上以趙普負太祖厚恩不忠不  
可祀元臣四傑木華黎爲首安童其孫也宜去孫而奉  
祖既祀伯顏阿朮可勿祀又以陳平馮異潘美節義善  
始終皆宜祀於是定風后力牧臯陶夔龍伯夷伯益伊  
尹傅說周公旦召公奭太公望召虎方叔張良蕭何曹  
叅陳平周勃鄧禹馮異諸葛亮房玄齡杜如晦李靖李  
晟郭子儀曹彬潘美韓世忠岳飛張俊木華黎博爾忽

博爾木赤老溫伯顏凡三十七人遣官致祭

### 功臣廟

甲辰 上取武昌命建忠臣祠于鄱陽湖之康郎山又

建于南昌府

詳開國臣傳

曰崇德報功國之大典自古兵爭

忠臣烈士以身殉國英風義氣雖死猶生予與陳友諒戰于鄱陽湖將臣效忠死敵昭然可數然有功不報何以慰死者之心而激生者之志哉爾中書其議行之議上卽命塑功臣像于卞壺及蔣子文廟以時遣官致祭

其南昌府康郎山處州府

耿再成等

金華府

胡大海等

太平府

花雲

等

各功臣廟亦令有司依期致祭未褒贈者論功定擬以聞立劉成廟于長興 洪武元年命築壇于雞籠山祭故功臣胡大海等文臣歿于王事者叅軍李夢庚郎中王愷都事孫炎等祔祭卽其地建功臣廟廟成定位次徐達爲首凡二十一人

見大政記

歿者塑像生者虛其位

賜額曰英靈坊設掌祀正九品圖徐常二王戰蹟于廟中各指揮祔祭兩廡 三年定功臣守墓墳戶其冬大封功臣思天下大定皆諸將之功然存者得膺爵賞死者不復見矣乃設壇親祭之且撫其兄弟子孫俾食原祿又設壇祭戰沒軍士優養父母子妻復命禮部凡武

臣有遷葬者皆備祭物道里遠者給其費因品秩次第

定給羊豕酒果立開平王廟于北平定功臣已沒者謚

號 七年命書雞籠山功臣廟附祭功臣姓名于籍每

歲遇祭則製神主行三獻禮都督官祭堂上

惟六王塑像

各

衛指揮祭兩廡永爲定式

八年增祀淮安侯華雲龍

平章李思齊等八人

又曰一百八人

九年加贈趙德勝等七

人封號增都指揮僉事余隆等百三十一人又增何文

輝等凡有功者一百六人 十二年增海國公吳禎等

一百九十三人

十三年改雞籠山爲雞鳴山增濟寧

侯顧時等二百八十人

又曰二十人

北平中立皆立開平王廟

旗幟廟

旗謂牙旗皇帝命大將選日出師牙旗者將軍之精一  
軍之形候凡始豎牙必祭以剛日祭牙之日吉氣來應  
大勝之徵幟謂旗頭也太白陰經曰大將軍中營建幟  
天子六軍故用六幟以犛牛尾爲之在左駢馬首秦置  
旗頭騎以先驅漢武帝置靈旗爲兵禱則太史奉以詣  
所伐孫權作黃龍大牙旗後齊天子親征建牙旗唐宋  
及元皆有牙旗幟之祭今立廟春秋遣官致祭春用鶩  
螯日秋用霜降日廟立于京師都督府治之後天下衛

所立于公署後 七年詔皇太子率諸王詣閱武場祭  
旗纛具儀衛執事者捧旗纛于馬上以序前行凡七壇  
各用羊豕一角色赤皇太子先行禮次諸王禮畢諸王  
詣皇太子行幕進胙奉旗纛還官

### 城隍廟

先儒謂既有國社不應復有城隍故唐李陽冰縉雲城  
隍記謂祀典所無惟吳越有之然成都城隍祠唐太和中  
中李德裕所建張說有祭城隍文杜牧有祭黃州城隍  
文則不獨吳越爲然又蕪湖城隍建於吳亦爲一節焉

齊慕容儼梁武陵王祀城隍神皆書於史又不獨唐而  
已宋已來其祀徧天下或錫廟額或頒封爵至或遷就  
傳會各指一人以爲神之姓名如鎮江慶元寧國太平  
華亭蕪湖等郡皆以爲紀信龍興卽南贛袁江吉建昌  
臨江南康皆以爲灌嬰張說祭京州城隍文曰致和產  
物助天育仁張九齡祭洪州城隍文曰城隍是保毗庶  
是依則前代崇祀之意有在矣國初因元之舊廟洪武  
三年上以卑隘詔度地營築改東嶽行祠爲之修飾  
既備禮臣請如前代建六曹上罷之止稱左司神右  
司神送主入廟用王者儀仗上親爲文以告先二年



上謂禮臣曰明有禮樂幽有鬼神若城隍神者歷代所  
祀宜先封爵遂封京都城隍爲承天鑒國司民升福明  
靈王其在北京開封府者爲承天鑒國司民顯聖王臨  
濠州府爲承天鑒國司民貞佑王太平府爲承天鑒國  
司民英烈王和州爲承天鑒國司民靈護王滁州爲承  
天鑒國司民靈佑王皆一品餘在各府州縣者府爲鑒  
察司民城隍威靈公秩正二品州爲鑒察司民城隍靈  
佑侯秩三品縣爲鑒察司民城隍顯佑伯秩四品其章  
服京都城隍袞冕十有二章開封等五府封王及府封  
公者九旒九章各州縣封侯伯者七旒七章命翰林撰

制文頒之次年去諸神前代封爵止稱本號曰都城隍  
某府州縣城隍之神其用王禮各府州縣稱公侯伯與  
用袞冕如故

### 忠臣廟

吳元年 上勅禮官曰自古忠臣義士舍生取義身歿  
而名存以垂訓天下後世若元右丞余闕守安慶屹然  
當南北之衝援絕力窮舉家皆死節義凜然又如江州  
總管李黼身守孤城力抗強敵臨陣死義與闕同難自  
昔忠臣義士必見褒崇於後代蓋以勵風也宜令有司

建二祠肖像歲時祀之尋以元御史大夫福壽能秉節  
死義立祠以祀議贈官禮部言元已贈爲浙江行省左  
丞相上柱國追封衛國公諡忠肅宜仍其舊 上是之  
令每歲春秋二仲月遣官致祭後福壽子陳龔以中書  
宣使爲海州同知坐胡黨當刑 上以忠臣子特宥擢  
太僕少卿轉兩浙運使復坐前事赦不誅謫居雲南勅  
西平侯善遇之應天故有歷代忠臣漢秣陵尉蔣忠烈  
侯子文晉卞忠貞壺南唐劉忠肅仁瞻宋曹武惠彬元  
衛忠肅福壽凡五廟 上以溷處間巷改建雞鳴山之  
陽漢壽亭侯關羽廟在玄津橋西亦改作與歷代帝王

功臣城隍諸廟並前五廟通稱十廟帝王廟擇日另祭  
祭功臣之日並祭入廟應天府官行禮水旱諸大臣分  
禱卞劉曹三氏子孫歲亦來祭

### 馬神

周官牧人掌六馬之屬春祭馬祖夏祭先牧秋祭馬社  
冬祭馬步馬祖天駟星也孝經說云房爲龍馬先牧始  
養馬者其人未聞馬社始乘馬者世本曰相士作乘馬  
馬步謂神之災害於馬者隋用周制祭以春仲月唐宋  
因之今擬春秋二仲月甲戌庚日爲宜於是卽後湖遣

官行禮爲壇四牲用羊一豕一鶩一其色白樂用時樂  
獻官齋戒公服行禮先蜀明昇獻良馬十其一色正白  
身長十有一尺首尾高九尺足高七尺有肉隱起項下  
厚五分廣三寸餘貫膺絡腹精采流動羈勒不可近近  
之輒人立而吼上謂天既生此英物必有神以司之  
命太常以少牢祀馬祖復囊沙四百斤壓馬令人跨其  
上日遊行苑中久之性漸馴服四年上夕月于清涼  
山乘之而出如躡雲乘風驅馳甚適上大悅賜名飛  
越峯後止于仲春祭司馬一神後邊將言西域產一馬甚異上遣  
使諭其酋長靳惜陰傷其足來獻上命祭馬神牧典

所善養之尋馬足瘡進之 上爲良馬說復命儒臣爲  
文以述其事

### 五祀之神

周漢唐宋其制不一今擬以孟春祀司戶之神設壇于  
皇門左司門主之孟夏祭司龜之神設壇于御厨光祿  
寺官主之季夏祀中霤之神設壇于乾清宮丹墀內官  
主之孟秋祀司門之神設壇于午門之左司門主之孟  
冬祀司井之神設壇於井前光祿寺官主之四孟月之  
祭則於有事 太廟之日季夏之祭則於土旺之日牲

用少牢

外郡各廟

洪武八年三月命有司立張巡許遠廟於歸德州歲時致祭禮部奏秦蜀守李冰鑿山堰流以備水旱民始殷富漢文翁爲蜀守仁愛化民興學教子弟宋張詠爲蜀守恩威並用民畏而愛之李冰已載祀典文翁與詠未及奉祀今擬以文翁張詠與冰同一祠祀卓茂爲密令黃霸爲河南丞皆漢之循吏具載漢史釣州有霸廟址密縣亦有茂廟址葺而祀之正合祀典陸遜及子抗從子凱世爲吳郡人當三國時文武兼資爲吳將相以勞定國松江舊祠址尚存宜令有司葺祠致祭四川隆川



土神垂休侯李龍遷臣事於梁築城保障山蜀邦人祀  
之雨暘疾疫祈禱必應唐狄仁傑諫立廬陵王復唐社  
稷嘗謫爲彭澤令奏免田租縱囚還家如期復至彭澤  
舊有祠宇理安僊祀謝夷甫肅宗時爲京畿令孟湜押  
兵過境縱掠百姓夷甫捕而斬之李輔國譖之於朝流  
建州卒葬甌寧後見夢於帝立廟賜名靈通封武英侯  
元江州路總管李黼之姪秉昭臨難死節安從黼廟食  
九江義兵萬戶李宗珂從余闕守安慶城陷闕死宗珂  
自刎闕既立祠安慶宜以宗珂配享韶州知府王世安  
奏請修唐賢相張九齡宋名臣余靖祠陝西乾州同知

史孟通言唐忠臣渾瑊在德宗時涇原兵變乘輿在奉天逆臣朱泚據長安引兵圍奉天晝夜攻城經月城中資糧俱盡瑊獨引兵苦戰百計禦敵卒能保乘輿全城郭功載唐史今其祠廟在而祀事有關甚非報功勸忠之意宜令有司每春秋致祭皆從之著在祀典

### 無祀鬼神

洪武三年 命祭無祀鬼神 上以兵革之餘死無後者其靈無所依命議舉其禮禮官奏祭法王祭泰厲諸侯祭公厲大夫祭族厲泰厲謂古帝王之無後者公厲謂古諸侯之無後者族厲謂古諸大夫之無後者又土

喪禮疾病禱於厲鄭氏謂漢時民家皆秋祀厲則此祭  
又達於民也春秋傳曰鬼有所歸乃不爲厲然則鬼神  
祭享無所歸則必爲害古者七祀於前代帝王諸侯卿  
大夫之無後皆祭後世以爲涉於淫詔非禮之正遂不  
舉行而此等無依之鬼乃或依附土木爲民禍福以邀  
享祀蓋無足恠今欲舉其祀宜於京師王國各府州縣  
及里社皆祭而天下之淫祀一切屏除使鬼之無所歸  
附者不失祭享則天厲不興是亦除民害之一也 上  
然之乃命京都築壇於玄武湖中天下府州縣則皆設  
壇於城北其各里社又立祭壇歲以三月清明七月望

祭官脫履協律郎樂舞生脫襪供事祭畢降壇納舄其  
日月太歲星辰海瀆風雲雷雨天下山川原合祭於城  
南諸神享祀之所初建於城南門外中殿五楹南自東  
西爲庫各七楹西北爲厨庫房各五  
間庫之後爲  
宰牲房三間又命中書省下郡縣訪求應祀神祇名山

大川聖帝明王忠臣烈士凡有功于國家及惠愛在民  
者俱核實以聞著祀典有司歲時致祭然在京師者尚  
未有壇壝專祀先後下禮官考古制以聞按周禮大宗  
伯以實柴圭璧五寸祀日月星辰禮記曰王宮祭日也  
夜明祭月也祭日于壇祭月于坎以別幽明以制上下  
考之古者日月其禮有六特性曰郊之祭大報天而主

日以配月一也玉藻鑑曰朝日于東門之外祭統曰祭日于東郊祭月于西郊二也大宗伯肆類于四郊兆日于東郊兆月于西郊三也月令孟冬祈來年于天宗天宗日月之類四也覲禮拜日于東門之外及祀方明禮日于南門之外五也雪霜風雨之不時則祭日月六也說者謂因郊社而祀之者非正祀也類祭而祀之與覲諸侯而禮之者非常祀也惟春分朝之于東門之外秋分夕之于西門之外者祀之正與常者也蓋天地至尊故用其始而祭以二至日月次天地春分陽方永秋分氣尚長故祭以二分爲得陰陽之義也若其次則大

次小次重幣重按其牲醴得實柴其服則玄冕玄端其圭之纁籍則大采小采禮之之玉則一圭邸璧祀之之樂則奏黃鍾歌大呂舞雲門凡見于周禮者如此秦祭八神六曰月主七曰日主雍有日月廟漢郊太乙東向揖日西向揖月又于殿下東西拜日月宣帝于神山祠月魏明帝始朝日東郊夕月西郊唐以二分日朝日夕月于國城東西宋以春分朝日秋分夕月爲大祀元于郊壇以日月從祀其二分朝日夕月皇慶中議建立而不見施行今旣以日月從祀郊壇當稽古者正祀之禮各設壇專祀爲宜其壇制朝日壇宜築于城東門外高

八尺夕月壇宜築于西門城外高六尺俱方廣四丈兩  
壇墼各二十五步燎壇方八尺高乙丈開上南出戶方  
三尺神位以松栢爲之長二尺五十濶五寸跌高五寸  
朱漆金字朝日以春分日夕月以秋分日星辰則祔祭  
于月壇 上曰日月旣皆設專祭而星辰乃祔祭於壇  
非禮宜別設壇祭周天星辰禮部議於城南諸神享祭  
壇正南向增造屋九間朝日夕月祭周天星辰日月仍  
以春秋分祭星辰則於 天壽節前日致祭 上朝日  
于東郊牲用赤犢一羊一豕一玉用圭璧五寸幣用赤  
色設大尊著尊山罍各二在壇上東西北面象尊壹尊

山壘各二在壇下實以醴齊盎齊清酒其明水玄酒各實于上尊邊豆各十簋簋各二所實與社稷同登三實以大羹鉶三實以和羹西郊夕月儀牲幣用黑 太歲者十二辰之神說文歲字從步從戌木星一歲行一次歷十二辰而一周天若步然也自子至巳爲陽自午至亥爲陰所謂太歲十二辰也陰陽家說又有十二月將十二時所直之神若天乙罡太乙功曹太衡之類雖未經見歷代用之唐宋不載祀典元每有大興作祭太歲月將日直時直於太史院若風師雨師之祀則見于周官秦漢隋唐亦皆有祭天寶中又增雷師于雨師之次



因升風雨雷師爲中祀宋元因之 嶽鎮海瀆之祀虞舜以四仲月巡狩而祭四嶽東曰泰山四嶽之所宗也故又曰岱宗南嶽曰衡山西嶽曰華山北嶽曰恒山而未言五嶽王制曰天子祭天下名山大川五嶽四瀆始有五嶽四瀆之稱蓋以中嶽嵩山並列也又周官小宗伯兆四望於四郊鄭玄謂四望爲五嶽四鎮四瀆者江河淮濟也四鎮者東曰沂山西曰吳山南曰會稽北曰醫無閭詩序又曰巡狩而祀四嶽河海則又有四海之祭蓋天子方望之事無所不通而嶽鎮海瀆在諸侯封內諸侯亦各以其方祀之秦罷封建嶽瀆皆領於祀官

及漢復建諸侯則侯國各祀其封內山川天子無預焉  
武帝時諸侯多廢五嶽皆天子之邦宣帝時四瀆始有  
使者持節特祠之禮由魏及隋嶽鎮海瀆皆卽其地立  
祠命有司致祭唐宋之制有命本界刺史縣令之祠有  
因郊祠而望祭之祠又有遣使之祠元遣使祀嶽鎮海  
瀆分東西南北中爲五道其天下山川之祀虞書曰望  
於山川徧於群神周頌曰懷柔百神周禮小宗伯兆山  
川丘陵墳衍各因其方王制凡山川之小者其祭秩視  
伯子男劉向謂山川能生物出雲雨施潤澤品類以百  
數故視伯子男其在諸侯又自祭之如楚祭雉漳晉祭

惡池齊祭配林是以秦罷封建則皆領於祠官焉由漢唐以及宋元嶽鎮海瀆之外又有其餘山川之祀不獨嶽瀆也今國家開創之初嘗以太歲風雲雷雨嶽鎮海瀆天下山川京都城隍及天下城隍皆祀於城南享祀之所既非專祀又屋而不壇非禮所宜考唐制以立春後丑日祭風師於城東北立春後申日祭雷雨於城東南以今觀之天地之生物動之以風潤之以雨發之以雷陰陽之幾本一氣使然而各以時別祭甚失享祀本至於海嶽之神其氣流通暢達何有限隔今宜以太風雲雷雨諸天神合爲一壇嶽鎮海瀆及天下山川

城隍諸地祇合爲一壇春秋專祀從之遂定以驚蟄秋  
分日祭太歲諸神以清明霜降日祀嶽瀆諸神壇據高  
阜南向四面垣圍壇高二尺五寸方濶二丈五尺四寸  
陛五級東西北向陛三級紀天神則太歲風雲雷雨五  
位並南向位皆用大牢一遵豆各八簋簋各二尊三帛  
一用雅樂未幾上以分祀時日與品物各不同復以  
風雲雷雨嶽鎮海瀆皆陰陽一氣流行無間者遂合二  
壇一之而增以四季月將爲第一次風雲雷雨次五嶽  
次五鎮次四海次四瀆次京都鍾山次江東山川次江  
西山川次湖廣山川次淮東淮西山川次浙東浙西福

建山川次廣東廣西海南北山川次山東山西河南河北山川次北平陝西山川次左江右江山川次安南高麗山城諸國山川次京都城隍六纛大神旗纛大將五方旗神戰船金鼓銃礮弓弩飛鎗飛石陣前陣後諸神各壇之祭皆 上躬自行禮先祭日禮官奏祝文太歲以下至四海凡五壇 上稱名餘者令禮官代署 上曰朋友書牘往來尚親題姓名況神明乎必親署及登壇太常司丞任以忠贊禮慮 上力倦頗簡跪薦之儀禮畢 上問故以忠實對 上曰人臣愛君以道朕之于神惟恐誠敬未盡何敢憚勞汝當悉朕意後勿復然

以忠頓首謝

三年定嶽鎮海濱城隍諸神號詔曰自元失馭群雄鼎沸土宇分裂聲教不同朕奮起布衣以安民爲念訓將練兵平定華夷大統以正永惟爲治之道必本於禮考諸祀典如五嶽五鎮四海四瀆之封起自唐世崇名美號歷代有加在朕思之則有不然夫嶽鎮海瀆皆高山廣水自天地開闢以至于今英靈之氣萃而爲神必皆受命於上帝幽微莫測豈國家封號之所可加瀆禮不經莫此爲甚至如忠臣烈士雖可加封號亦惟當時爲宜夫禮所以明神人正名分不可以僭差今依古定

制凡嶽鎮海瀆並去其前代所封名號止以山水本名稱  
其神郡縣城隍神號一體改正歷代忠臣烈士依當時  
初封以爲實號後世溢美之稱皆宜革去惟孔子善明  
先王之要道爲天下師以濟後世非有功於一方一時  
者可比所有封爵宜仍其舊庶幾神人之祭名正言順  
於禮爲常用補朕以禮事神之意五嶽稱東嶽泰山之  
神南嶽衡山之神中嶽嵩山之神西嶽華山之神北嶽  
恒山之神五鎮稱東鎮沂山之神南鎮會稽山之神中  
鎮霍山之神西鎮吳山之神北鎮醫無閭山之神四海  
稱東海之神南海之神西海之神北海之神四瀆稱東

清大淮之神南清大江之神西清大河之神北清大濟  
之神各處府州縣稱某府某州某縣城隍之神歷代忠  
臣烈士並依當時初封名爵稱之天下神祠無功於小  
民不應祀典者卽淫祠也有司無得致祭凡不在祀典  
而別有功德於民事蹟昭著者雖不致祭其祠宇禁人  
撤毀乃命都督孫遇仙等一十八人祭天下嶽鎮海瀆  
之神賜冠帶及衣二襲白金十兩米十五石是日 上  
服皮弁服御奉天殿禮官以香及祀文進 上躬署御  
名以香祝授使者百官公服送至中書省使者就行香  
用黃金爲盒貯之黃綺旛二白金二十五兩以供辨祭



物牲用大牢幣各從其方色

九年 上以嶽鎮海瀆祀典所重其所在祠宇宜致尊嚴以稱神居於是分遣國子生周渭等三十一人往修祠宇各賜巾衣靴襪俾所至齋沐而後行事併下禮部嶽鎮海瀆之祀京師春秋二祭自有常期遣官行禮并所在有司之祭勿與京師同日因命大臣十八人分祀嶽鎮海瀆韓國公李善長祀中嶽魏國公徐達祀北嶽曹國公李文忠祀東嶽宋國公馮勝祀西嶽江夏侯周德興祀南嶽吉安侯陸仲亨祀東鎮延安侯唐勝宗祀西鎮江陰侯吳良祀南鎮濟南侯顧時祀北鎮平涼侯

費聚祀中鎮陸安侯王志祀東海

洪武元年命道士

海神原德未至前數日並海之民見海清恬息聞空中  
洋洋然若有神語者皆驚異及原德至臨祭烟雲交合  
異香郁然靈風清肅海潮響應設事父老欣喜相賀爭  
至原德所曰海濤不息者十餘年矣今聖人應運太  
平有北海濱之民何幸身親見之管陽侯楊璟祀西海  
原德還奏上悅後以破倭致祭

永嘉侯朱亮祖祀南海潁川侯傅友德祀北海宜春侯  
黃彬祀江濱南安侯俞通源祀河濱中山侯湯和祀淮  
濱宣寧侯曹泰祀濟濱制曰天生民而立君君爲民而  
立命百神之祀乃國家之先務也朕與卿等當群雄角  
逐之時戰勝攻取非天地之照鑒嶽鎮海濱之効靈安  
得至是今孟秋在邇嶽鎮海濱之祀理在報祭古者人

君巡狩則祭名山大川於各方岳之下今朕國家新造  
民生始遂未獲親徃特命卿等代朕以行汝徃欽哉

## 封建

洪武二年編祖訓錄定封建諸王國邑及官屬之制  
三年造冊寶皆用金寶依周尺方五寸二分厚一寸五  
分其篆文曰某王之寶匣寶座雕造螭螭餘同皇太子  
冊寶制并定國邑冊封禮儀以封建告 太廟宴群臣  
于奉天門及文華殿 上諭廷臣曰元失其馭群雄並  
起四方鼎沸民遭塗炭朕躬率師徒以靖大難 皇天  
眷佑海宇寧謐然天下之大必樹藩屏上衛國家下安  
生民今諸子既長宜各有爵分封鎮國朕非私非親乃  
遵古先哲王之制爲久安長治之計群臣對曰 陛下

封建諸王以衛宗社天下萬世之公議 上曰先王封建所以庇民周行之而久遠秦廢之而速亡漢晉以來莫不皆然其間治亂不齊特顧施爲何如爾要之爲長久之計莫過于此乙丑冊封諸皇子爲王詔天下曰朕造基江左命大將軍徐達統率諸將以定中原不二年間海宇清肅虜遁沙漠大統旣正黎庶靖安欲先論武功以行爵賞緣土蕃之境未入版圖今年春復命達等帥師徂征緣是報功之典未及舉行朕惟帝王之子居嫡長者必正儲位其諸子當封以王爵分茅胙土以藩屏國家朕今有子十人卽位之初已立長子標爲皇太

子諸子之封本待報賞功臣之後然尊卑之分所宜早  
定乃以四月七日封第二子楨爲秦王第三子桐爲晉  
王第四子棣爲燕王第五子橚爲吳王第六子楨爲楚  
王第七子榑爲齊王第八子梓爲潭王第九子杞爲趙  
王第十子檀爲魯王從孫守謙爲靖江王皆授以冊寶  
設置相傳官屬及諸禮儀咸有定制冊秦王文曰昔君  
天下者祿及有德貴子必王此人事宜然然居位受福  
國于一方並簡在帝心第二子楨今命爾爲秦王永鎮  
關中豈易事哉朕起農民與群雄並驅艱苦百端志在  
奉天地享神祇張皇師旅伐罪救民時刻弗怠以成大

業今爾有國當敬慎守禮祀其宗社山川謹兵衛恤下  
民必盡其道體朕訓言尚其慎之諸王文同冊靖江文  
曰朕稽古帝王撫有方夏必茂建親支所以惇族固本  
其來尚矣朕既爲天子追念吾兄以爾守謙兄之孫也  
卽王靖江以鎮廣海之域毋忽訓語益修厥身尚其慎  
哉因遣使頒封建諸王詔于安南高麗諸國置大宗正  
院秩正一品後改爲宗人府

四年建諸王府工部尚書張允言諸王宮城宜各因其  
國擇地請秦用陝西臺治晉用太原新城燕用元舊內  
之用武昌王竹寺基齊用青州益都縣治潭用潭州玄

妙觀基靖江用獨秀峰前報可以明年次第營之仍令  
無得過飾省臣言親王宮飾朱紅室飾大青綠若不爲  
過之上曰惟儉養德惟侈蕩心獨不見茅茨卑宮堯以  
典阿房西苑秦隋以亡諸子方及寇去朕左右豈可靡  
麗蕩心命陶凱等采摛漢唐以來藩王善惡可爲勸戒  
者爲書會凱出叅行省編輯未成於是召秦府右傅文  
原吉修撰王傑等續修之書成宋濂爲序以進賜名昭  
鑒頒賜諸王定王府官制左右相正二品文武傅從二  
品後改爲長史司正五品首領官不設承奉以下仍舊首領官叅軍從五品錄事  
正七品內曰承奉外曰儀衛審理等皆備官



八年 上命皇太子晉王楚王靖江王出遊中都以講  
武事詔太子贊善大夫宋濂秦府長史林溫晉府長史  
朱右楚府長史朱廉靖江長史趙堦等從旣行 上閱  
輿地書得濠梁古蹟一卷命內臣馳驛以賜東宮且題  
其外令濂詢訪隨處言之皇太子至池河驛得 上所  
賜書大喜以示濂濂因啟曰臨濠古塗荆二山最著塗  
山在鍾離縣西九十五里荆山亦在縣西八十三里二  
山本相聯屬而淮水繞荆山之陰神禹鑿之水始流二  
山間民獲免阻修之難禹之功也十一月壬申皇太子  
旣過中都乃徃遊焉命濂撰文記之其他古蹟濂歷歷

舉之因事進說甚有規益事畢還京師

九年 上以諸王將之國先告 太廟群祀畢始告祀

天地于園丘遣使祭各國山川定諸王公主歲供之數  
親王歲支米五萬石鈔二萬五千貫帛四十疋紵絲三  
百疋紗羅各一百疋絹五百疋冬夏布各一千疋綿二  
千兩鹽二百引茶一千斤馬疋草料月支五十疋其段  
疋歲給匠料付王府自造靖江王歲賜米二萬石鈔一  
萬貫餘物比親王減半馬疋草料月支二十匹郡王每  
歲支米六千石鈔二千八百貫帛一十疋紵絲五十疋  
紗羅各二十疋絹一百疋冬夏布各一百疋綿五百兩

鹽五十引茶三百斤馬匹草料每月支一十疋公主郡主以下有差 上以秦晉燕三王將之國 命先往鳳陽觀 祖宗肇基之地俾知王業所由興且命皇太子率之祭開國功臣然後行

十一年冊皇子椿爲蜀王栢爲湘王桂爲豫王模爲漢王植爲衛王改封吳王櫚爲周王 詔秦王棧晉王桐之國其護衛軍士秦府三千七百四十八人晉府三千八十一人及文武官軍匠雜役各賞賚仍詔燕王棣周王橚楚王楨齊王樽還駐鳳陽工部奏諸王園宮城縱廣未有定制請以晉爲準周圍三里三百九步五寸東

西一百五十丈二寸五分南北一百九十七丈二寸五分制曰可戊子 勅秦相府官曰王府設官本古之道然昔者惟以文章之士爲輔朕封諸子兼設武臣於相府者蓋欲藩屏國家禦侮防患無事則助王之治所以出則爲將入則爲相今靖江相府官與指揮耿良不協甚有欺凌指揮之意由是命武相有警則出而爲將護衛指揮副之歸則勿與金穀刑名之事軍務則文武議之道王以善勿乖朕意

十二年燕府營造訖繪圖以進其制社稷山川二壇在於城南之右王城四門東曰體仁西曰遵義南曰端禮

北曰廣智門樓廊廡二百七十二間中曰承運殿十一間後爲圓殿次曰存心殿各九間承運殿之兩廡爲左右二殿自存心承運周迴兩廡至承運門爲屋百三十八間殿之後爲前後三宮各九間宮門兩廟等室九十間王城之外周垣四門其南曰靈星餘三門同王城門名周垣之內堂庫等室一百三十八間凡爲宮殿室屋八百一十一間

十三年三月燕王之國給賜燕山中左二護衛侍從將士五千七百七十人鈔二萬七千七百七十一錠

十五年八月 皇后馬氏崩秦晉燕周楚諸王奔喪

二十一年壽節秦晉等九王來朝凡七日辭歸

二十三年周王棄國來居鳳陽謫遷雲南命豫王桂居其地尋召還以世子有燉監國事明年王仍復國考定王國合祀山川諸神 上曰王國有嶽鎮卽以嶽爲主次海次鎮次瀆風雲雷雨之神又次之於是李原名爲圖以進使頒諸王復命東海則燕齊皆祭東嶽東鎮齊魯皆祭西海秦蜀皆祭晉祭北海所在城隍不稱地稱曰某國

二十四年冊皇子橈慶王權寧王梗岷王懋谷王松韓王模濟王楹安王極唐王棟郢王模伊王漢衛谷慶寧

岷六王往臨清訓練軍士并設護衛召秦王還京 皇太子巡撫陝西將改封秦王 皇太子既還代爲請乃遣歸

二十五年改封豫王桂爲代王漢王棖爲肅王衛王植爲遼王

二十六年詔肅王棖遼王植慶王橈寧王權之國初

命肅王都甘肅遼王都廣寧慶王都寧夏寧王都太寧

至是甘肅以陝西各衛調戍功力未集命肅王且駐平

涼廣寧以宮殿未成命遼王且駐大凌河北寧夏以糧餉未敷命慶王且駐慶陽右韋州城以就延安綏德和

賊惟寧王就國

十五年後齊王之國青州湘王之國魯王之國兖州蜀王之國成都代王之國

今王以下明年谷王之宣府岷王原封

是年輯

以雲南路遠改封餘皆永樂時之國

永鑒錄

二十七年命韓王松藩王模往省秦王晉王燕王周王

齊王上以二王年勿欲其遊觀諸王國都以敦友悌

之情故有是命二王之行從官各十一人翰林編修王

府紀善各一員掌侍從講說經史撰文字禮部郎中一

員掌祭祀所過名山大川及祀典神祇序班二員掌贊

相禮儀良醫二人扈從二王同日啟行至宿州分道韓

王由周歷燕齊藩王自齊歷燕晉抵秦事畢皆至八月

而還上以雲南土曠民稀輸餉勞苦復加興造時力



未堪岷府姑爲棕亭以居俟十五年後財富力紓作之  
未晚又以遼東軍務物情尚未寧貼高麗言多不實營  
繕暫停遼王止立柵結屋以居俟十年作之

二十八年四月秦王倭薨 上諭禮部尚書任亨泰曰

秦王旣沒國事無統世子長成宜命襲爵爾其集議泰  
亨會大漢諸王薨遣使者拜嗣子爲王玄冠衰經素服  
承詔事訖反喪服又諸侯受天子命亦宜服其命服使  
者出反喪服卽位而哭旣合于禮且協人情詔依命服  
禮行封世子尚炳爲秦王八月更定皇太子親王等封  
爵冊寶之制皇太子親王俱授金冊金寶皇太子妃王

妃公主授金冊不用寶皇太子嫡長子爲太孫次嫡子并庶子年十歲封郡王授塗金銀冊銀印親王嫡長子年十歲授金冊金寶立爲王世子次嫡子及庶子年十歲皆封郡王授塗金銀冊銀印凡王世子必以嫡長如或以庶奪嫡輕則黜爲庶人重則流竄遠方若王年三十正妃未有嫡子其王世子若王庶子襲封及王世子并郡王娶妃郡王子授鎮國將軍曾孫授奉國將軍六世孫以下授奉國中尉其有文武才堪任用者宗人府具以名聞考驗陞遷如常選法如或有犯宗人府取問明白其實奏聞輕則量罪降等重則黜爲庶人但明賞

罰不加刑責著爲令九月更定親王歲支祿米先是

上謂戶部尚書郁新等曰朕今子孫衆盛原定親王歲給祿米各五萬石今天下官吏軍士甚多俸給彌廣其斟酌古制量減各王歲給以資軍國之用議更定親王歲給祿米萬石郡王二千石鎮國將軍一千石輔國將軍八百石奉國將軍六百石鎮國中尉四百石輔國中尉三百石奉國中尉二百石公主及駙馬二千石郡主及儀賓八百石縣主及儀賓六百石郡君及儀賓四百石縣君及儀賓三百石鄉君及儀賓二百石皇太子次嫡子并庶子旣封郡王必俟出閣然後歲賜與親王子

已封郡王者同女候及嫁然後歲與親王女已嫁者同  
郡王嫡長子襲封郡王者歲賜比始封郡王減半支給  
上于是重定 祖訓錄名爲皇明祖訓其目仍舊而更  
其箴戒章爲祖訓首章 上以是編之作將垂之萬世  
命大書揭于右順門內西廊下朝夕詳覽斟酌損益又  
而後定旣而遣使召諸王至京諭以減祿米之故且以  
皇明祖訓賜之 上以子孫蕃衆命名之際慮有重複  
乃於東宮諸王世系各擬二十字每一字爲一世以其  
字爲命名之首其下一字則臨時所議以爲二名編入  
玉牒

二十九年命靖江王世子贊儀往省晉燕周楚齊蜀湘  
代肅遼慶谷諸王先自楚湘入蜀歷陝西出河南山西  
抵大同東至宣府北平由大寧至遼東轉至山東擇文  
武忠厚之士以從 上以贊儀年幼欲其知親親之義  
且令涉山川險易以成其德器故也

三十年八月丁未 上以在外諸王非時興作擅役工  
匠諭部臣曰天下人匠編成班次勒期赴役

每有興造臨期之際趨此違彼艱莫甚焉夫勞民動衆  
春秋所戒方今諸王在國宮室各有定制皆宜守禮安  
分勿擾于民可也朕聞元時廬州太子爲修宮室令民

冒暑昇木監司版圖兒見其苦卽釋之又如威慎王在武昌因怨小吏械繫之于市廉訪司官言此小事王宜勿預王卽釋之此二子皆知禮奉法聽納正言所以能保其富貴也今諸王府各守定制不可私有興造勞吾民匠若有應須造作必不可已者須奏請方許爾可移文各王府知之

高皇帝御製及纂輯諸書

御製文集題後

洪武七年

臣聞有德者必有言蓋有德者和順積中英華發外無非天然之文不待勉強而後成譬猶大化流行融液通暢而萬物發舒各得生生之妙精神充衍無往不在故大舜作五絃之歌湯爲盤銘武王造起居之誡皆燦然成文此楊子雲所謂聖人之言炳若丹青也恭惟皇帝陛下統御以來用人文化成天下睿訓諄復惟恐一夫不獲其所天縱聖能形諸篇翰奎壁照耀層霄絢采光被上下萬象動色然而建中于民寤寐弗忘則有

虞臯財解慍之歌也夙夜修省常如神明森列左右則  
湯武盤盂几杖之銘也仁民愛物之心隨感而見布于  
方策溫潤深醇貫乎斯道光芒氣燄蓋覆乎六合前聖  
後聖實異代而同符也臣供奉詞林幸日侍几硯仰瞻  
揮灑之際思若淵泉頃刻之間烟雲盈紙有長江大河  
一瀉萬里之勢跪捧而觀殷彝周鼎未足喻其古也太  
山喬嶽未足喻其高也風霆流行未足喻其變化也蓋  
由天德粹純無聲色之好無遊畋耽樂之從聚精會神  
凝思至道形於心聲同功造化非語言形容之可盡也  
且當萬幾之暇時御翰墨多不畱藁見於侍臣之所錄



者得若干篇臣竊以爲日星昭回于天下飾萬物蒼生  
無不仰照 聖皇之文猶日星也是宜刻于文梓流布  
四海使見之者咸獲咏歎文明之化熙熙皞皞相與率  
德勵行以爲忠孝之歸豈不盛哉於是敬錄如上文與  
時凡五卷續有制作復編類爲後集云翰林侍講學士  
順大夫知制誥同修國史兼太子贊善大夫臣宋濂  
拜手稽首謹書

先祖以天縱之聖生于元季貧困流離雖少時常遊鄉  
塾而稍長未暇詩書不得已從戎展仄淮左三四年間  
若遇若違若明若晦金雞旣號而狐跳曙星將朗而霧

還兜鍪劍戟安事毛錐渡江之後

神明頓開視儒生

如故交拆微義若宿解從心所欲燦然昭回嘗謂儒臣

曰朕每有所損夜半注思釋然自順豈非天平文章關

乎氣運而人心風俗隨之漢唐宋以來文體代降遞至

胡元流于詞曲其敝已極

聖祖挺生直追太古既紆

獨得兼集衆長其著作其誥檄其纂輯諸書朴茂渾淪

則三代以上古帝王之法物也明白正大又三代以下

誦大儒之格言也緣而飾之以乾健不息之體段布酌

時敘之規模中間道之以德禮齊之以威刑乎之以

既凋既琢復返于璞拔出既陷之靈臺洗淨乂塵

鏡天藻所垂光于千古臣東海暨儒稍加纂輯爲  
以大訓二紀復再揭出以宋學士所題列于前庶稍  
本末其大明直解律令大誥三編別見各從其類云

臣朱國禎謹識

以丙申三月都應天 庚子三月宋濂劉基等來歸  
辛丑八月伐陳友諒克江州 御製西征記基母憂

手書慰之中引徐庶爲比言庶母尚存故劉先主  
先生之母壽八十餘逍遙踏更生之路當加食自寬  
掌綱常正宜教人忠孝旣來助我事業未成若果思  
必當且止于禮助我功成遣官同鄉里薦母劬勞豈

美哉 壬寅二月苗軍之亂基助守備賜書有我高  
無憂之言三月 上自洪都歸再與基書云自江西  
後屢有不祥皆應先生前教幸獲殄滅奸黨疆域少  
兵避暑遣人專詣先生虔求一來又得墨諭以六  
月間舉兵用事不利先動當候土木順行金星出見  
生一二年間以天道開發所向無敵今不敢違然擇  
七月二十一日甲子未得吉時再差詣前望以生民  
念德教爲心早賜來臨是所願也如或未可卽將年  
吉日時辰方向門戶擇定密封發來 甲辰正月  
卽吳王位視師武昌再與基云去歲先生行言湖廣

事一去便得然不卽得須候至二月賊果詐降又堅壁

不出果應其言

以上皆署名頓首奉書伯溫老先生閣下上與儒臣諸將臣多用手書賜魏

公者尤多其宋至今尊藏頗見大訓記餘可類推御製文集所刻尚未能盡今只就年月可攷有關機事及大體者摘出殆千百之十一云 乙巳春宋濂臥病 上謂侍臣曰宋

起居純飭之士不叅以分毫人僞侍予五年猶一日也何有斯疾數問未愈命歸養金華山中父子祖孫驩然同聚疾必易愈愈且速來國家文翰庶幾有賴陞辭出大府金籍以束帛賜之方嚴肩輿之禁自相國以下不敢用特造安車掄健丁六人以載尤異數也 皇太子以舊學加賜既至家表謝并致書太子寓箴規之意

上覽再三喜甚謂太子曰此書汝宜日誦一遍御啓書  
御撰親筆花押絨內外著其日月復出綺縉命太子署  
名卽家賜之六月七日也 丙午訪求古今書籍藏秘  
府以資覽閱因謂侍臣詹同等曰三皇五帝之書不盡  
傳於世後鮮知其行事漢武帝購遺書六經始出唐虞  
三代之治始可得而見武帝雄才大略後世罕及至表  
章六經開闢聖學又有功於後世吾每於官中無事輒  
觀孔子之言如節用愛人使民以時真治國之良規孔  
子之言誠萬世師也方徵儒士熊鼎朱夢炎至都下命  
修公子書及務農技藝書諭公卿貴人子弟雖讀書多

不能通曉與義今集古忠良奸惡事實以恒詞直解之  
使觀者易曉他日縱學無成亦知古今行事可以觀戒  
民間商賈子弟亦不讀書宜以所當務者直辭解說作  
務農技藝商賈書使通知大義可以化民成俗十一月  
書成頒行之

洪武元年二月

御製紀夢因與學士朱升等論周禮

六夢曰近觀周禮見有所謂六夢者因思去秋嘗夢在

鄉里遊舍南

見大訓

忽然驚覺若此者其思夢耶升對曰

夢者人之精神所感此誠

陛下膺命之兆所謂正夢

也昔皇帝夢遊華胥而天下大治已有之蓋帝王之興

自有天命非人智力所能致也 三月命翰林儒臣修

女戒

見大訓

四月 上幸北京至邳州自爲文祭山川

召知州李相出御筆一道諭曰山東故官聽其從宜居處以俟選用相復奏曰其有願往南京及旋故鄉者何以遇之 上曰稽其人數赴京者日子米二升還故鄉者給一斛遂登御舟著黃河說至汴梁親畫進征圖示大將軍 上以祭祀爲國大事念慮之間儆戒或怠則無以交神明乃命禮官及諸儒臣編集郊社宗廟山川等儀及歷代帝王祭祀感應祥異可爲監戒者爲書以進

四月七年

賜名存心錄

十一月手書召還劉某行封



賞

見基本傳

二年八月 詔儒臣修纂禮書其書以吉凶軍賓嘉冠服車輅儀仗鹵簿字學樂爲綱所該之月吉禮十四曰祀天曰祭地曰宗廟曰社稷曰朝曰夕月曰先農曰太歲風雲雷雨師曰嶽鎮海瀆天下山川城隍曰旗纛曰馬祖先牧馬社馬步曰祭厲曰祀典神祇曰三皇孔子嘉禮五曰朝會曰冊拜曰冠禮曰婚禮曰鄉飲酒賓禮二曰朝貢曰遣使軍禮三曰親征曰遣將曰大射鹵禮二曰吊賻曰喪儀又冠服車輅儀仗鹵簿字學各一樂三曰鍾律曰雅樂曰俗樂凡升降儀節制度名數纖

言  
悉備具通五十卷

三年九月書成賜名大明集禮又命儒士魏俊民黃憲  
劉儼丁鳳鄭思先鄭權六人編類天下州郡地理形勢  
降附始末爲書東至海南至瓊崖西至臨洮北至北平  
爲大明志書送秘書監鈐梓頒行

四年正月御史臺進憲綱四十條 上親刪定刊行

九月 御製乎西蜀文示劉基末曰中國清寧論將之  
功傳一廖二低昂定焉又曰天產名將兵出農間非朕  
有能實由天鑒有臣在南家居枯蒼生而能文舉筆何  
難謂我採擇黼之班班基獻乎西蜀頌并序

臣聞天命  
真主混一

合必先有以爲之驅除然後收拾以歸其黨自古反  
同一揆矣是故冬寒之極必有陽春激清之卜必有  
渾大亂之後必有大治理則然也元德既衰九土屢  
命張狼顧之豪彌滿山澤萬姓嗁嗁無所領告天乃  
命我皇帝肅將武威代伐不道一伐而定荆湘再伐  
而舉全吳三伐而海甸廓清四伐而東粵南閩悉歸版  
圖於是肆伐中原拾宋叔素掣起拔燕兵鋒未至聲聞  
先及神驚鬼慄匍匐伏玄菟青海崑崙大漠交趾鋒  
耳之國罔不獻琛奉表稽首闕下無敢後者獨明昇竊  
據巴蜀雖遣使奉貢而不法偽號大匡背請討之皇  
帝憐其父沒子勿數遣使招之不至乃命將帥師伐之  
洪武四年大軍破羅塘殺其將某郡邑鎮戍望風送款  
昇乃率其官屬奉璽印詣軍門請降蓋自建國至是凡  
五年而天下一統何其易耶固知天命有在而群雄並  
起爲之驅除也臣基受恩深厚無能補報遙聞捷音歡  
喜踴躍不能自已謹撰平西蜀頌一首雖不足以贊揚  
聖德萬一亦聊以寓葵藿向日之忱云爾其辭曰惟彼  
蜀國開自盤叢山川隔閩與華不通金牛啓道厥竅斯  
鑿岷峨巖峩始連井絡秦以之霸漢以之王諸葛用之  
震驚北方劍閣倚天瞿塘折地仰不可攀俯不可視秦

茲羗戎憑其陰阻周知天命大那是距赴赴虎臣受命  
于征出師桓桓如雷如霆如雷如霆天子之威廟筭先  
定鬼神莫違靈旗輝輝指山摧羗人失魂慙若死灰  
爰將其臣奉其版籍泥首軍門面縛銜璧六軍奏凱聲  
動玄黃驚童白叟蹈舞康莊四海會同豐年獲獲慶雲  
甘露自天降祥臣拜稽首受天之佑受天之佑天子萬  
壽

# 五年八月申明誠諭書成頒天下

## 六、正月群經類要成

宋濂序曰論語解二章此上所親製以賜翰林修撰臣孔

克齊而旨深洪武六年詔克表及御史中丞臣劉基  
秦府紀善臣林溫取諸經要言析為若干類以恒言釋  
之使人皆得通其說而盡聖賢之旨意又慮一二儒臣  
未達注釋之凡乃手釋二章以賜克表俾取則而為之  
克表等承詔釋四書五經以上賜名曰群經類要以  
臣濂嘗與開斯事命議其左方臣聞聖人治天下養之  
以政而教之以道三代以降未有兼之者皇上以聖

智之資治民之政一法乎古復慮經旨晦而人不知道  
乃釋諸經以教之其爲後世慮者可謂詳且備矣克表  
適際其盛預執筆承明詔豈非幸哉昔唐之盛時太  
宗有志於教化而孔氏曰頴達者實率諸儒爲五經疏  
天下至今傳而誦之不廢今上開物牖民之心過  
於太宗而克責爲諸儒首孔氏可謂世不乏人矣先

是命禮部尚書陶凱主事張等等采摭漢唐以來藩  
王善惡可爲勸戒者爲書會凱出叅行省輯未成於是  
秦王傅文原吉翰林編修王俱國子博士李叔允助教  
朱復秦府錄事蔣子杰等續修之書成凡二卷宋濂爲  
序以進賜名曰昭鑒錄頒賜諸王四月重刊律令憲  
綱頒諸司五月祖訓錄成見大賜詹同方竹記同侍  
上武樓談古帝王事旁稽物理偶及於竹上曰竹之

類其亦多乎同對曰其類實繁晉戴凱之所譜至五十餘種或根如盤輪或節若束針或細則勝箭或鉅可爲舟有未能歷舉者大槩其色皆青其體皆圓唯吳越山中有名方竹者最爲侏異四稜直上弗偏弗頗若有廉隅不可犯之色以故士大夫愛之往往采而爲筇上曰信有諸乎同因取一枝以獻上摩挲觀之悅曰臣同其亦信人哉草方竹記一通始言品物之夥中序格致之難及其末也謂同爲人俊偉氣豪稽之傳記智過百人曰豪千人曰俊殆其近之俾給事中繕書以賜同將趨拜墀下上笑曰卿頭童齒豁矣何以謝爲

六月 上幸大本堂堂乃太子講道之所諸親王肄業於左右當時勛舊之子亦聽執經入侍 上旣至召開平忠武王子鄭國公常茂蘄國武義公子蘄春侯康鐸列于堦下親書二帖一賜茂一賜鐸皆八字云謹承祖業愛爾勤功帖傍書康二子以別于茂鐸兄鑑僉廣西護衛指揮司事 九月編起兵以來日曆徵義烏舉人黃杲繕書杲文獻公潛之從曾孫也見 上問得其家世喜出尚方表履以賜復見 皇太子十一月望日劉基詹同宋濂侍宴乾清官之便閣被酒還史館同愛杲有俊才賦一詩贈之俄而召同等赴右順門 上適

乘步輦而至同餘醒猶未解 上謂同曰卿醉未醒耶

同對曰臣雖醉猶能賦詩贈黃秀才 上曰詩何在對

曰在史館中 上顧濂急取以進 上笑謂濂曰朕即

和同詩卿當為朕書之濂書訖乃以賜杲日曆書成凡

一百卷

見宋  
濂傳

七年五月編

皇明寶訓

見大  
訓

九月孫貴妃薨

勅

禮官定喪服之制編孝慈錄

見大  
訓

十二月

御註道

德經成自為序

見大  
訓

是年宋濂編

御製文集

見前  
序

八年正月洪武聖政記成

宋濂序曰漢高帝得國最正  
雖曰筭無遺策而施之政令

猶乏精詳故史臣替之亦但云規模宏遠而已夫以高  
帝雄傑尚如此則其餘可知 皇上以布衣受天命蓋



與高帝同雖當開闢土疆之際停戈講藝息馬論道夜以繼日無一時之間迨夫正天位朝萬國尊華國治恒若不足於是網舉于上目備於下誠非高帝所可及者如郊廟以及百神之祭禮文咸秩則祀事嚴矣御極之日卽立儲位大本定矣衆建諸王列封功臣大分昭矣兵戎之衆自京師達于郡縣率皆設衛權一出於朝廷而爲將者不得私而軍政肅矣官有定制一革冗濫之弊而俸位絕矣冠服有別防範有則民志自定無僭侈矣他如申禁令嚴實效育人才除前代禮儀之失去海嶽之封嚴官壺之法勵忠節之訓刻積歲之弊如斯之類不一而足或前王所未行或行之有未至者皆煥然有條可以垂法後世此其故何哉蓋自近代以來習俗圯壞且及百年而天生大有爲之君首出庶物一新舊染之俗與民更始是故睿思所斷勳獎典則度越千古此正所謂錫鬯智而正萬邦臣備位詞林親見盛德大業日新月著於是與僚屬謀取其有關政要者編集成書列爲上下卷凡七類合

二月

御製資治通訓

成

訓見大

三月洪武正韻成

宋濂序曰人之生也則有聲聲出而七音具焉所謂

音者牙舌唇齒喉及舌齒各半是也智者察知之分其清濁之倫定為角徵宮商羽以至於半商半徵而天下之音盡在是矣然則音者其韻書之權輿乎夫單出為聲成文為音音則自然協和不假勉強而後成虞廷之賡歌康衢之民謠始未暇論至如國風雅頌四詩以位言之則上自王公下逮小夫賤隸莫不有作以人言之其所居有南北東西之殊故所發有剝疾重遲之異四方之音萬有不同孔子刪書皆堪被之絃歌者取其音之協也音之協其自然之謂乎不特此也楚漢以來離騷之辭郊祀安世之歌以及於魏晉諸作易嘗拘於一律亦不過協比其音而已自梁沈約拘以四聲八病始分為平上去入號曰韻譜大抵多吳音也及唐以詩賦設科益嚴聲律之禁因禮部之掌貢舉易名曰禮部韻畧遂至毫髮弗敢違背雖中經二三大儒且謂承襲之久不欲變更縱有患其不通者以不出於朝廷學者亦未能盡信唯武夷吳越患之尤深乃稽易詩書而干逮於近世凡五十家以為補韻新安朱熹據其說以協三有篇之音識者雖或信之而韻之行世者猶自若也嗚呼音韻之備莫踰於四詩詩乃孔子所刪舍孔子弗之從而唯區區沈約之是信不幾於大惑歟皇上稽

古右又萬機之暇親閱韻書見其比類失倫聲音乖舛  
召詞臣謝曰韻學起於江左殊失正音有獨用當併爲  
通用者如東冬清青之類亦有一韻當析爲二韻者如  
虞模麻遮之屬推類不可枚舉卿等當廣詢通音韻者  
重刊定之于是合諸儒凡六脣繫始克成編其音諸韻  
協者併之否則析之義同字同而兩見者合之舊避宋  
諱而不收者補之註釋則一依毛晃父子之舊勒成一  
十六卷計七十六韻共若干萬言書奏賜名曰洪武  
正韻勅濂爲之序竊惟司馬光有云備萬物之體用  
者莫過於字包衆字之形聲者莫過於韻所謂三才之  
通性命道德之與禮樂刑政之原皆有繫於此誠不可  
不慎也古者之音唯取諸協故無不相通江左制韻之  
初但知縱有四聲而不知衡有七音故經緯不交而失  
立韻之原往往拘礙不相爲用今聖人在上車同軌  
書同文凡禮樂文物咸遵舊章然上繼唐虞之治至  
於韻書亦入冥慮下詔詞臣隨音刊正以洗千古之  
陋習猗歟盛哉雖然旋音以七音爲均均爲言韻也有能  
推十二律以合八十四調旋轉相交而大樂之和亦在  
是矣

八月

上觀川流不息陋尹程秋水賦未契于道

乃更爲之賦召翰林諸臣觀之命各撰一篇宋濂率同  
列次第獻賦 上皆親覽評品已而賜坐勅太官設酒  
饌內臣行觴 上顧濂曰卿何不盡飲濂對不能飲恐  
愆于禮 上曰更宜一觴濂辭 上曰一觴豈便醉人  
乎濂舉觴瑟縮 上笑曰男子何不慷慨濂一吸至盡  
上大悅濂而頰行不成步 上復笑曰卿宜自述一詩  
朕亦爲卿賦醉歌 上賦成賜濂濂頓首謝 上仍命  
群臣各賦醉學士歌以見一時君臣同樂也  
十年三月吏部主事談士奇至中書科領勅蓋司勳職  
掌也 上御步輦而至問曰爾爲誰士奇以官以名對

曰其義云何曰臣聞之於師俊美之謂奇曰爾之入仕  
儒耶吏耶對曰習刀筆之吏考功監令郭傳在側奏曰  
士奇雖吏頗誠慤自持 上因命奉御取筆以進書曰  
夫吏之爲奇公以事法以當律天下他所不及乃曰  
奇凡二十二字學士宋濂解曰背私之謂公當理之謂  
法行法當理則不謬於是非處事無私則允合於公正  
苟能是雖律之天下人將有所不及始可謂之奇

十一年立 皇陵碑 上以儒臣恐有文飾自爲文命

江陰侯吳良督工立石

見大訓

十二年 上以春秋本諸魯史而列國之事錯見間出

欲究其終始則難于考索乃命東官文學傳薄等纂錄  
分列國而類集之附以左氏傳首周王以尊正統次魯  
侯以仍舊文列國則先晉齊而後楚吳所以內中國而  
外夷狄也事之始終秩然有敘六月書成賜名曰春秋  
本末

十三年胡惟庸伏誅 上以朝廷用人待之本厚而久  
則恃恩肆爲姦宄然人性本善未嘗不可教戒乃命儒  
臣纂錄歷代諸侯王宗戚宦官之屬悖逆不道者凡二  
百十二人備其行事以類書之曰臣戒錄頒布中外俾

所警

十六年先是 上將享 太廟齋于武英殿召大學士

吳沉等謂之曰朕閱古聖賢書其垂訓立教大要有三  
曰敬天曰忠君曰孝親君能敬天臣能忠君子能孝親  
則人道立矣然其言散在經傳未易會其要領爾等其  
以類編輯庶使觀覽 二月書成以進 上善之賜名

精誠錄 命沉爲序凡三卷敬天一卷取易十章書七

十二章詩十七章禮記二十七章孝經論語各一章

忠君一卷取易大學中庸各一章書四十六章詩十章

禮記十四章左傳六章國語一章論語十四章孟子十

二章孝親一卷取易二章書三章詩九章禮記四十八

章論語一章孝經十九章大學二章中庸三章孟子十  
章

十七年十月大明清類天下分野書成其書以十二分  
野呈次分配天下郡縣於郡縣之下又詳載古今建置  
沿革之由通爲二十四卷

十九年 命贊善劉三吾編漢唐以來災異之應於臣  
下者別爲一書名曰省躬錄 十月頒臣戒錄採爲臣  
悖逆者百餘事示警

二十年

御註洪範書

見大訓

二十三年十月刊韻會定正時洪武正韻頒行已久



上以其字義音切未盡當命翰林重加較正學士劉三  
言前太常博士孫吾與所編韻書本宋黃公紹古今  
韻會凡字切必祖三十六母音歸一因以其書進上  
覽而善之刊行

二十五年八月頒醒貪簡要錄於諸司 上嘗諭廷臣  
曰四民之中士最爲貴農爲勞士貴者何讀書明道出  
爲君用坐享天祿農勞者何當春之時雞鳴而起驅牛  
秉耒而耕及苗既種又須耘耨炎天赤日形體憔悴秋  
成輸官所餘能幾一或水旱蟲蝗舉家遑遑無所望矣  
今居官者不知民艱刻剥虐害無仁心甚矣於是命戶

部臣備錄文武大小官品歲給祿米之數以米計其用穀之數又計田畝出穀之數與其用力多寡爲之書至是編成名醒貪簡要錄頒布中外俾食祿者知所以恤民

二十六年 上以諸司職有崇卑政有大小無方冊著成法恐後之蒞官者罔知職任政事施設之詳 命吏部同翰林官倣六典之制自府部以下諸司凡其設官分職之類類編爲書名曰諸司職掌行之尋頒功臣稽制錄 七月遣禮部員外郎潘善應司務譚孟高往廬山祭周顒僊 上自爲文立碑 十二月永鑑錄成其

書輯歷代宗室諸王爲惡悖逆者以類爲編直敘其事  
賜諸工又輯歷代爲臣善惡可勸懲者別爲書名曰世  
臣總錄

二十七年四月 詔徵儒臣定正蔡氏書傳 上觀蔡  
氏書傳日月五星運行與諸子詩傳不同及其他註說  
與鄱陽鄒季友所論間有未安者遂詔徵天下儒臣定  
正之太子少保唐鐸舉致仕前編修張美和博士錢宰  
等徵至語以正定之意且曰爾等知天象乎皆對不知  
上曰朕每觀天象自洪武初有黑氣凝于奎壁此乃文  
章之府朕甚異焉今年春暮黑氣始消文運自此興矣

爾等宜考古正今有所述作以稱朕意遂命學士劉三  
吾等總其事開局翰林院正定是書禮遇甚厚各賜以  
綺繒衣被等物又御製詩命次韻和之朝叅班於侍

衛之前宴享次坐殿中時酒樓成

上以海內太平思欲與民皆樂命工部

作十樓于江京諸門之外令民設酒肆其間以接四方  
賓旅其樓有舊為薛仙詠歌鼓腹來賓重譯等名既而  
又增作五樓皆成詔賜文人賜鈔宴其上各獻詩謝  
武百官鈔命宴于薛仙樓

上大悅復遣禮部尚書任亨泰諭旨諸臣有年老願歸  
者先遣之衆皆願留書成凡蔡氏集傳得者存之失者  
正之又集諸家之說足其未備三吾等率諸儒上進名  
曰書傳會選賜宴及鈔俾馳驛而還修寰宇通志書成

之目有八東距遼東都司又自遼東東北至二萬  
衛西極四川松潘衛又西南距雲南金齒南距廣東崖  
州又東南至福建漳州府北暨北平太寧衛又西北至  
陝西甘肅爲驛九百四十浙江福建江西廣東之道各  
一河南陝西山東山西北平湖廣廣西雲南之道各一  
四川之道三爲驛七百六十六凡天下道里縱一萬九  
百里橫一萬一千七百五十里四夷之驛不與焉

二十八年九月頒 祖訓條章於内外文武諸司 勅  
諭禮部曰自古國家建立法制皆在始受命之君以後  
子孫不過遵守成法以安天下蓋創業之君起自側微

備歷世故艱難周知人情善惡恐後世守成之君生長深宮未諳一切山林初出之士自矜已長至有好賊之臣徇權利作聰明上不能察而信任之變更祖法以敗亂國家貽害天下故日夜精思立法垂後永爲不刊之典如漢高祖刑白馬誓曰非劉氏者不王以後諸呂用事盡改其法逮至國家大亂劉氏幾亡此可爲深戒者朕少遭亂離賴皇天眷命剪除羣雄混一天下卽位以來勞神焦思定制立法革胡元弊政至於開導後世復爲祖訓一編立爲家法俾子孫世世守之爾禮部其以朕祖訓頒行天下諸司使知朕立法垂後之意永

爲遵守後世敢有言更改祖法者卽以奸臣論無赦  
十一月 上謂翰林學士劉三吾等曰朕自卽位以來  
累命儒臣歷考舊章自朝廷下至臣庶冠婚喪祭之儀  
服舍器用之制各有等差著爲條格俾知上下之分而  
有奸臣胡惟庸等擅作威福謀爲不軌僭用黃羅帳幔  
飾以金龍鳳紋邇者逆賊藍玉越禮犯分床帳護膝皆  
飾金龍又鑄金爵爲飲器家奴至于數百馬坊廊房悉  
用九五間數蘇州府民顧常亦用金造酒器飾以珠玉  
寶石僭亂如此殺身亡家爾等其重加考定以官民服  
舍器用等編類成書申明禁制使各遵守敢有仍前僭

用者必實于法成造之人如之至是書成曰禮制集要  
其目十有三曰冠服房屋器皿傘蓋床帳弓矢鞍轡儀  
從奴婢俸祿奏啓本式署押體式服制頒布中外十  
二月洪武志書成述都城山川地理封域之沿革官闕  
門觀之制度以及壇廟寺宇街市橋梁之建置更易靡  
不具載詔刊行之

三十年正月頒爲政要錄書載文武官屬體統及會書  
案牘次第軍士月給廩餼與宿衛之禁屯田之政凡十  
有三條

皇明大事記卷之九終